

Roztomili

Jak tak patrza na was, na ta Sala Sejmu (Śląskiego – red.), to widza, żech jest u siebie na Śląsku, ale jak ino zawrza łączy i was suchom, to wydowo mi sie, żech jest niy w Katowicach, a w parlamyncie Najjaśniejszy Rzeczypospolity w Warszawie. Czy wy sie gańbicie swoji mowy, wy tu mówicie o kodyfikacji naszego jynzyka, miast godać. Ino jedyn z mojih przedmówcow, pan Kallus łodważył sie wygłosić swoje propozycje w naszym ślonskim jynzyku, a reszta?

Roztomili, pismo jest po to, aby przeloć na papier nasze myśli i intyncje i trza to zrobić tak, żeby tyn, co czyto, wiedziol ło co nom chodzi, i musi to być proste jak przysłowiowy drot, a niy tak jak jest dzisioj, jak skarżoł sie jedyn Anglik na swoja gramatyka i godoł, że u nich sie pisze Churchill, a godo Czerczil, na co Francuz mu pado, że we Francycji jeszcze gorzy, bo łoni pizsom de Gaulles, a godajom Degol, na co Hanys pado: *chopy to jeszcze nic, bo my piszyny bulka, a godomy żymla*. Pismo mo być zrozumiałe do kozdego, kery je bydzie czytoł, niy tak jak w tym wicu, kaj zimom na kole przijechoł do szynku jedyn gorol. Widziol to upierdliwy, jak jo, Hanys i zdziwiony, że śniegu po kolana, a tyn na kole, pyto sie go: *pan na kole? A gorol na to: nie, proszę pana, na pepsi przyjechałem*. Włoz do tego szynku, wypioł ta pepsi, wylazi, wsiado na zic i luft mu pitnoł z koła. Na co Hanys pokazuje palcym na koło i godo: *pana*. A gorol mu na to: *nie, nie mój rower, od szwagra pożyczylem*. Tak, że jeszcze roz apeluja do tych, kerzy bydom kodyfikować: robić to jak nojprości, żeby wszystko boło jasne, jak tyskie piwo.

Dziynkuja.

Marian Makula – satyryk i artysta estradowy, członek wielu śląskich kabaretów, autor tekstów dla Radia Katowice i „Trybuny Śląskiej”.